

EUROPE

Un acuardi di colaborazion di grant respir tra l'ateneu furlan e chel di Clanfurt

Formazion e ricercje inte Euroregion

Si va indevant cu la azion di potenziament des colaboracions internazionâls de Universitât dal Friûl intal spazi european de ricercje. In chest sens, l'Ateneu furlan e la Universitât di Clanfurt a àn sotscrit une letare di intindiments par rinfuarçâ e incressi la cualitât e la proiezion internazionâl de alte formazion e de ricercje intal teritori de Euroregion. L'acuardi al è stât firmât inte capitâl carinziane dai doi retôrs, Cristiane Compagno

par Udin e Oliver Vitouch par Clanfurt.

L'acuardi al darà mût al ateneu furlan e a chel austriac di sperimentâ gnovis formis di colaborazion. In particolâr, par potenziâ i percors formatifs (lauree, lauree magjistrâl/master universitari, dotorât di ricercje); incentivâ la mobilitât di students e docents; intensificâ la cooperazion scientifiche e la pussibilitât di implei di docents e ricercjadôrs cun dople apartignince; disvilupâ ativitât di ricercje intai projjets di interès comun, cun riferiment

specific aes areis strategjichis pal disvilup culturâl, economic, sociâl e tecnologic de Euroregion. Par fâ i interventis e lis ativitâts previodudis, la letare di intindiments e istituis un Comitât di coordinament che al reste in cjarie tre agns.

Il Comitât al scugnarà, par altri, elaborâ un program di azion cjapant drenti i ents scientifics teritoriâi, coordinâ lis variis iniziative, difondi lis informazions e monitorâ lis ativitâts disvilupadis in comun. L'obietif al è di fat chel di potenziâ lis sinerjiis intai

diviers cjamps disciplinârs e formatifs cu la costituzion di coordinaments strutturâts fra lis amministrazioni dai doi ateneus. "Chest acuardi – e à sotlineât la Compagno – al jentre inte politiche di aleancis strategjichis e colaboracions internazionâls dal nestri ateneu cuntune atenzion particolâr ae Euroregion, par aumentâ la competitivitât de nestre universitât intun spazi simpri plui european de ricercje e de alte formazion".

La cooperazion tra i doi ateneus, ative za di tancj agns, si è



tradote, in particolâr, in cuatri cors di lauree magjistrâl cul ricognossiment dal dopli titul. A son i cors di Comunicazion multimedial e tecnologiis de informazion, Informatiche, Ingegnerie eletroniche e Lenghis e letaturis europeanis e extra-europeanis (curriculum in Letterature austriache).